

摘藻堂四庫全書薈要

集部

欽定四庫全書薈要卷二萬五百三十七

集部

明詩綜卷六十四

翰林院檢討朱彝尊編

張以誠一首

以誠字君一松江華亭人萬曆辛丑賜進士第一  
授翰林修撰升右中允終右諭德有酌春堂集  
贈蕭大將軍移鎮漁陽

鳴沙城北接雲中千里飛狐一道通十萬健兒齊上馬

旌旗獵獵動秋風

王衡六首

衡字辰玉太倉州人萬曆辛丑賜進士第二授

翰林編修有緱山集

高孩之云辰玉詩清新踔越卒歸諸雅

靜志居詩話緱山才氣無前而韶年相酬和者不過陳仲醇一流臨終自訟曰吾於詩窺其藩未造其域可謂得失寸心知矣惜也未盡其蘊

雨中徐州道上

鄉山看在眼愁向暮山生驛舍清明雨人煙芒碭城花

飛急流盡雲起大河平一路茫茫白歸心亂旅程

十月

此日田功晏未誅冬月茅雨收紅豆莢霜老木棉苞地  
薄秋畦苦官新雜稅交君看窮鳥至歲暮亦登庖

十月十五日冊封分藩

琅函五色下芝宮十月陽春驛樹紅夜半日輪重海上  
天邊星影照江東老臣涕淚謳歌裏游子衣冠拜舞中  
檢點退思真過計當年園綺幸無功

穀城

出山逢老人入山化黃石千載石人前紛紛拜行客

支硎即事

夜來月暈半無光今日風來不可當我勸游人且歸去  
百花如雨下山塘

錢江浪淘沙

聞道山陰雪半消北連湖水下桐橋桃花浪起衝沙破  
恰好東風上白鰲

鄭以偉二首

以偉字子夫上饒人萬厯辛丑進士改庶吉士  
授翰林檢討歷左贊善右諭德左庶子少詹事  
升禮部右侍郎進尚書兼東閣大學士加太子  
少保有返泥集

徵兵

羽書諸道名勤王羅幕營前送啓行隆萬邊兵恒十萬  
薊門但付戚南塘

霜降疏請謁德陵

萬壑哀湍霜葉丹  
橋山劒烏碧天寒  
被恩殿下千行淚  
白髮當年舊講官

熊明遇一首

明遇字子良進賢人萬厯辛丑進士除長興知縣徵授禮部主事擢兵科給事中出為福建僉事轉陝西參議召為尚寶少卿轉太僕少卿升右僉都御史兵部左侍郎拜南京刑部尚書改

兵部尚書有綠雪樓集

釣舟

竹竿溪上釣魚舟  
洞口桃花信水流  
曉月半輪新雨霽  
春山缺處是嚴州

蔡毅中一首

毅中字弘甫  
光山人  
萬歷辛丑進士  
改庶吉士  
授翰林檢討  
降麻城縣丞  
升行人司副  
遷尚寶司丞  
降長蘆鹽運司判官  
再入為行人司副改



國子司業進祭酒升禮部右侍郎兼侍讀學士

秋興

木落江空天氣清  
西風蕭颯鴈南征  
浮雲暗逐年華變  
岐路虛憐短鬢生  
千里關河懸客夢  
萬家砧杵動秋聲  
崇蘭芳芷依然在  
何處江潭弔屈平

公 鴈 二十四首

鼎字孝與蒙陰人萬曆辛丑進士改庶吉士授  
編修歷少詹事禮部右侍郎謚文介有問次齋

橐

焦弱侯云先生詩發于情啗于旨極變窮工  
斟酌中和率歸大雅 趙季卿云先生詩博

大宏敞無湫隘之態 李季重云成弘以來李

何登壇狎執牛耳談藝者輒謂文章之權不在

館閣然如劉伯溫之警策宋景濂之溫純解大

紳之豪爽李賓之之浩瀚王濟之之簡潔曾子

啓王敬夫之高邁高季迪之超脫崔仲鳧之修

潔丘仲深之博雅楊用修之奇崛王允寧之簡

練康德涵之雄俊廖道南之富有於館閣中皆

稱獨詣其言不盡非亦不盡是也先生諸體咸

妙不屑屑摹古亦不沾沾是今極風雅之用晚

年山居諸什尤得真趣 王貽上云文介詩文

淹雅不減唐人風致絕句尤工 李渭

清云問次齋詩篇篇溫栗句句清脆

詩話言詩於萬歷則三齊之彥吾必以公文介

為巨擘焉即其論詩大指云風雅之後有樂府

如唐詩之後有詞曲聲聽之變有所必趨情詞之遷有所必至古樂之不可復久矣後人之不能漢魏猶漢魏之不能風雅勢使然也如漢朱鷺翁離之作魏晉諸臣擬之以鳴其一代之事易名別調當極其長豈以古今同異為病哉後世文士如李太白則沿其目而革其詞杜子美白樂天之倫則創為意而不襲其目皆卓然作者後世有述焉近乃有擬古樂府者遂頗以擬名其說但取漢魏所傳之詞句模而字合之中間豈無陶陰之誤夏五之脫悉所不較或假借以附益或因文而增損跼躐牀屋之下探肱膝篋之間乃藝林之根蠹學人之路阱矣以此語於作者之門不亦慙乎夫才有長短學有通塞取古今之人一一強同則千里之謬不容秋毫肖貌之形難為覲面若曰樂府則樂府矣盡人而能為樂府也若曰必此為古樂府使與古人

同曹而竝奏之其何以自容哉李于鱗曰擬議以成其變化噫擬議將以變化也不能變化而擬議奚取焉又云律詩出於古詩而難於古詩七言後於五言而難於五言故七律於諸體中最不易工古今長技惟杜氏耳杜氏之長則秋興懷古諸將數篇而已近世擬作甚多大率淺率牽合觀者厭焉又贈邢子愿長歌云為君歷代選宗工前稱弘正後嘉隆北地雄渾真大雅步趨盡出少陵下汝南俊逸誠天然邊幅姿態未全捐濟南匠心奇且麗藻續無乃傷辭意武昌才美謝諸君節制之師獨出羣東吳囊括靡不有利鈍未能免人口大抵明興只數家瑜者從來不掩瑕餘子紛紛未易說擬議原非吾所悅丈夫樹立自有真何為效彼西家顰益力攻摹擬之非然觀其七律仍以歷下為宗故有文章一代李滄溟之句同時名家者馮用韞于念

東王季木皆  
拔萃者也

唐蒙有絲

唐蒙有絲不可以縫戴星有穀不可以舂天有匏瓜其  
誰食之海有昆布其誰衣之飛鳥依人不可與語嘉樹  
蔽身不可與處鶴飛于天其鳴在陰魚沉于淵其潛在  
深

客從遠方來

客從遠方來貽我雙文禽置之巾箱中寶惜如黃金朝

夕供飲啄顆粒比璆琳羽翼日以長翻飛歸遠林去不  
歸故棲來不懷好音聚散自恒理眷戀傷予心積羽投  
洪波誰能定浮沉臨崖激翻車誰能論高深

詠古

二首

齊糾亡公子乃有從死臣田橫士五百臨難皆隕身西  
京萬億衆符命爭美新古來稱得士惟在意氣真推心  
置人腹豚魚亦相親

古人獲我心善達窮通理安危慮所居屈伸貴自己已

貴可復賤中立常不倚衰至易生驕腊毒恒在美薛公  
僅遺榮疏傳庶知止寥廓晞冥鴻矰繳安可擬

歸田雜詠 三首

導汶自艾山南流達新甫東蒙配岱宗其首挈鄒魯一  
山一水間幽勝略可數薄營本荒陬芟除闢宿莽雙溪  
作襟帶連岡若環堵結屋八九間開徑數十武歆仄植  
亭棧夷曠築場圃畚鍤連朝昏胼胝易寒暑但求靜者  
便不厭作者苦

避地恐不深吾必在汶上曠野多平疇游目足自廣南  
岡一握中林麓稍森爽石壁拓精舍石門斲新壤陽崖  
連陰峰遨遊愜心賞呼兎荷鉞鋤攜儷治績紡既欣禾  
豆登復見桑麻長八口可無饑亦足代祿養豈必規達  
人庶幾屏塵想

遠遊得暫歸機事久方釋漸與朝市遠轉戀林野寂田  
疇日以親風雨頗相習農人告及春欣然顧襁負杖  
桑陰午荷鋤麥隴夕遶屋榆烟暝隔水梨花白遠目任



縱橫安步隨偃息一區安蓬蒿一盂飽橡栗溪山本不  
廉琴酒堪自適

擬杜遣興

人苦不知足有願何終極當其入天門猶未厭羽翼一  
朝成蹭蹬唾井無復惜昔日李將軍灞亭人不識

秋夜

河之水清泠泠漾月色明空庭對牛女此夜情願為乾  
鵲飛青冥相思宛轉何時平

濟河道中

汶水南通楚清河北帶齊故山雲淦淦長路草萋萋野  
曠秋天闊峰高夕日低前村疑漸近轉盼暝烟迷

穆陵關

昔日齊侯履南疆盡此封諸山沂作鎮五岳岱為宗

沂山

亦名東  
太山

霸國猶餘業重關識舊蹤故園相去近回首海

雲重

棲霞邠都宮丘長春成道處

乘槎涉弱水陟降迄仙都石室誰開闢丹臺跡有無十  
洲為近地五岳識真圖坐聽鸞笙晚勞峰天外孤

南竺感舊

鐘磬重巖裏楸梧亂石間水窮仍見水山近却無山感  
慨因懷舊淹留為愛閒自嗟塵網繫雖倦不知還

過蒙陰舊城山家留飲

故堞依山麓相傳漢舊城桑麻千畝遍梧竹一邨平客  
醉遲歸意來希重別情出門逢野老重與話躬耕

辛丑得第赴館年逾仕矣

釋褐明經暮操觚祕館嚴因知進士少

唐諺五十少進士

不遂

老夫潛慣見蒼龍礎

通典舉人獻充庭充庭初識蒼龍礎

仍攀翠羽簾

洞冥記漢武帝招賢閣以翠羽為簾

僂然諸俊後白髮幾莖添

梁臺遇雨

不見梁臺月孤亭暮雨昏感時思艮嶽懷古問夷門苑  
竹龍鍾發宮槐兔目存星軺疎應接白鳥對開尊

諸將

上谷漁陽拱帝京相連河外受降城一從塞馬來南牧  
遂使王師罷北征絕徼尚傳青海箭中原新動綠林兵  
主憂正值宵衣日誰向天山荅太平

過漢高祖廟

豐南松柏晚蒼蒼漢祖遺宮古道傍父老祇今餘涕淚  
風雲依舊各飛揚一抔事業歸陵土萬歲神靈在故鄉  
却憶炎精銷歇後千秋王氣屬吾王

習家池

峴首峒堯漢水長習家烟樹野亭荒羊公流涕山公醉  
竝枕殘碑臥夕陽

西郊金主釣臺

花石遺京陷戰圖薊門衰草釣臺孤不知艮岳宮前叟  
得見南兵入蔡無

畿南問宋遼戰地

戰勝河東下薊丘高粱失御陣雲愁六飛不入燕山府  
直見鑾輿到廣州

明湖獨眺

窄岸平橋萬柳斜  
半城春水半人家  
東風吹雨宵來急  
一片鄉心到海涯

南樓

十二樓開列玉京  
分明天上落層城  
檐前寂寂三珠樹  
半夜鶴飛枝上鳴

掖縣道中

齊疆行盡海雲生  
處處看山自問名  
麥秀漸漸桑柘綠

馬頭不見曲侯城

董光宏 二首

光宏字君謨鄞縣人萬曆辛丑進士除刑部主  
事歷員外郎中出為河南提學僉事轉參議副  
使參政遷陝西按察使江西右布政入為順天  
府尹升南大理卿致仕加南兵部右侍郎有秋  
水閣集

補陀



東南澤國半往往饒異蹟大海峙補陀懸崖幾千尺層  
波山震撼斷厝石蒼赤明滅九點烟超忽萬里舶翻風  
鷺鳥退近岸亂帆擲西方有聖人東海乃其宅年來詔  
使至旛幢颭巖石我亦飛渡來流覽感今昔摩挲蒼葛  
花四望曉天白

許昌道中

青郊小雨裊游塵正是芳菲一半春花柳故園應共笑  
主人歲歲作行人

許  
獬一首

獬字子遜同安人萬厯辛丑會試第一賜進士  
出身改庶吉士授編修有許鍾斗集

孟夏陪祀太廟仿顏延之郊祀歌

皇祖於昭賓於帝里照臨萬方匪遠伊邇享祀苾芬陟  
降來止其祀維何大輅玉几穆穆皇皇百辟卿士其德  
馨香升聞不已皇祖居歆醉飽具起孝孫有顒報以繁  
祉自今伊始

雷思霈 一首

思霈字何思夷陵州人萬曆辛丑進士改庶吉士授檢討有歲星堂集

北郊鷹房作

遼城金壘古鷹房  
羊角風沙接大荒  
野窟舊無狐兔蹟  
小池今有芰荷香  
黃鸝獨語遮深柳  
粉蝶叢飛戀短牆  
千古幽州還禹甸  
卜年開統憶先皇

袁懋謙 五首

懋謙字吉卿豐城人萬厯辛丑進士改庶吉士  
授兵科給事中有虎溪詩選

擬古二首

行者日以行思者日以思日月相代謝荏苒踰歲時君  
子在萬里獨宿誰與怡徘徊增感傷託夢通音徽音徽  
不可接涕泣沾牀帷披衣還起立東西迷所之

熠熠花間螢照我庭東廂高飛不能起斂羽舒其芒云  
是腐草化耀此玄夜長逢時被渥澤朽質自生光

山中晚歸

晨出後鳴雞夕歸先倦馬山烟已染衣望之在平野霞  
光逐日散暝色浮空下追羣獨鳥飛韻壑奔流瀉事去  
無中戀情來非外假入門誰為娛邛釀聊可把

同年郭太素從廣陵攜姬人為白下之游賦別

白門花月可憐宵宛轉朱欄映畫橋怪得彩雲飛不散  
玉人新度廣陵簫

東封日本歌

司馬頻年苦運籌東封擬解廟堂憂如今却似商人婦  
愁水愁風望去舟

詩話此嘲東明石  
尚書拱辰作也

茅瑞徵 二首

瑞徵字伯符歸安人萬厯辛丑進士除知泗水  
縣調黃岡擢兵部主事歷郎中終南京光祿寺  
卿贈大理寺卿有澹樸齋集

詩話大理鹿門從孫家世饒裕鹿門孜孜治生  
大理耽情吟詠歷官有廉吏之目壯年即解組

歸田自叙云炙手不知炎下石不知險脂膏不  
知潤軒冕不知榮胸無機械意無好醜殆天下  
之至愚人也因自號茗上愚公官職方時  
著有象胥錄三大征考詩亦真率自喜

### 彭城懷古

望彭城彭城面面水環匝與城平君不見馬中赤兔人  
中布引水灌城走無路

### 送薛駕部還陝

朔風日以厲肅軫超西秦行行歸故鄉而我失所親與  
君同舍郎况乃託比鄰相望朝伊夕綢繆亦有因一旦

出門辭飛飛闕陝塵仰盼浮雲駛悵然憶遠人懸知經  
歲別分手自愴神願展平生意河梁寫其真聊將盈尊  
醪叙此離情新我亦賦歸來離合難具陳

俞彥

十首

彥字仲茅太倉州人萬曆辛丑進士除兵部主  
事歷員外郎升光祿少卿有擬古樂府

詩話少卿擬樂府自南北朝入亦是解人第篇  
幅稍長輒未合古此韓退之所云不造其堂不  
齊其叢

者也



企喻歌

新降吐谷渾齊唱部落稽  
汝勿復驕來聽企喻辭

琅琊王歌

二首

金陵山四圍都城帝王住  
江水從西來淮水東南注  
北面望琅琊可憐盡空閣  
鹿挺走他山復藉豐草活  
淳于王歌

鬱鬱田中禾禾熟自成穗  
沉沉合歡帳獨寢不成寐

讀曲歌

與歡橋頭別楊柳纔垂絲空局不著子尋思未有棊

雍州曲

可憐南雍州形勝山四抱南湖與北渚都上大堤道

作蠶絲

蠶老變作蛹吐絲外成繭但見外綢繆中心無由見

自君之出矣

自君之出矣心愁如調飢思君如貪吏無有饜飽時

折楊柳

二月江水平春洲春樹生垂楊復垂柳  
新雨更新晴蕩子年年別東風歲歲晴

捉搦歌

兩馬異力問輿騶兩絲異色問離婁  
兩狐異革問司裘兩人異處問蹇修

孫光裕

一首

光裕字子長嘉興人萬厯辛丑進士除建昌知縣補固始擢山西道御史升南光祿少卿有廉

善堂集

酌酒與韓求仲

君不見塞上翁失馬不足憂得馬不足喜禍邪福邪迭  
相倚世事大都皆若此邯鄲婦嫁厮養兒宿瘤身入齊  
宮裏紛紛好醜難具陳好醜由天不在人大夢之中還  
說夢浮漚聚散蘧屈伸百年能得幾時樂十九憂愁病  
與貧吁嗟乎侏儒飽欲死東方飢欲死才人坎壈自昔  
然落落寧惟吾與子且須飲酒醉莫辭人生亦貴適意

耳

趙士諤二首

士諤字謇卿吳江人萬歷辛丑進士除會稽知縣入為職方主事調考功司歷文選郎中遷太僕少卿以僉都御史巡撫宣府有中丞詩選

送周蓼洲吏部

久繫中朝望嘉招慰物情不誇津地重獨喜市門清是處成蹊徑憑誰秉國成渙羣今日事行矣慎持衡

來季方還蕭山

彷彿經過三十秋，年年盼望越來舟。  
幾番夜雨曾聯榻，何處春山不共游。  
往事茫茫渾是夢，故人落落總堪愁。  
老來轉覺難離別，欲去還期十日留。

蔡善繼一首

善繼字伯達，烏程人。萬曆辛丑進士，除莆田知縣，調香山，入為工部主事，歷郎中，改兵部，出知泉州府，歷湖廣、福建左右布政使，有去去齋集。

春日閒居

幽樓未擬絕塵寰  
楚帝橋西水一灣  
樹裏暗浮鄰寺塔  
樓頭青入傍城山  
不緣好客寧沽酒  
祇為高僧遂出關  
春鳥自鳴花自舞  
禪心竟日與雲閒

譚昌言一首

昌言字聖俞嘉興人萬歷甲午鄉試第一辛丑  
進士知常熟婺源城三縣遷南兵部主事歷  
員外郎中升福建參議提學轉山東按察副使

以參政卒于官贈太僕寺卿有捐石居遺集

詩話譚公宰常熟識瞿起田於諸生中移婺源  
盡鐫徽國文公遺書儲之高閣課士子誦習迨  
視學于閩杜絕請託試卷不假一人寓目皆手  
自甄綜案未發公子來省覲寄食旅店中不許  
入廨嘗自謂此官可棄此案不可移蓋視學三  
年而鬚髮盡白矣分守東萊有離令與遼將相  
構遂以遼兵叛聞巡撫初莅倉皇入奏檄登兵  
會勦登營多遼人偶語籍籍公大言曰遼將吾  
將遼民吾民誰敢言發兵者入營握遼鎮李性  
忠手令馳箭諭離營將士皆感泣毛帥在島門  
舉朝交倚為重公獨以東江進兵為贖局曰此  
登寇爾公以積勞嘔血死思陵即昨卹以死勤  
事諸臣特贈公太僕卿公在留都結  
詩社讀史社詩愛孟襄陽第不多作



贈吳興蔡叟

先生無俗侶野鶴與同羣  
奕對包山橘書開石室芸  
白蘋雙槳渡紅葉五亭分  
高隱看誰似將無鄭巨君

徐禎稷三首

禎稷字叔開松江華亭人  
萬厯辛丑進士除刑部主事  
歷員外郎中出知夔州府  
遷按察副使致仕起補浙江  
溫處道以病引歸有餘齋集

詩話叔開清門庶吏比於胡威父子其在夔府寄書家中附詩云寄語機雲山下水出山仍似

在山清益入蜀之後詩尤深婉句如千盤白鶴  
雲中路三暮黃牛峽口船卧閣秋雲生白帝登  
臺春雪和巴人雲邊古堞三千堆花裏春城十  
萬家水白瞿塘間榜柁雨晴赤甲見桑麻入春  
江勢疑吞郭一雨山光盡到樓天末鴈稀秋色  
盡山家橘熟夜霜清新猿雨後瞿塘路獨鴈風  
前故國心俱  
滿灑出塵

獨木橋

悲熊芝  
洞也

獨木橋林下渡蔓草徑山前路杖藜躡屐閒來去不怕  
秋風與秋雨君不見六州都督三軍將轅門馬道廣十  
丈飛虎風開赤羽旗盤龍日灼紅絲鞅世塗自合有翻

覆蒼茫眼底生陵谷北闕霜催壯士心西郊雨暗孤臣  
哭噫嘻東門黃犬不肯牽赤血要灑咸陽阡

澱湖

雪浪堆三泖風帆挂澱湖斷雲收雨淨高樹入秋孤暮  
色諸峰碧寒聲一鴈呼滄浪歌罷去漁父定吾徒

浦口望金陵

千金紫陌駐遊驂繡閣銀燈酒半酣十四年來魂夢斷  
今朝江北望江南

張  
鷟八首

鼎字世調松江華亭人萬厯甲辰進士改庶吉  
士授檢討歷國子監司業諭德庶子少詹事升  
禮部右侍郎加太子賓客落職起南吏部右侍  
郎掌詹事府事有寶日堂集

南山猛虎行

并序

景州道上官餉四千二百暴客十六人白晝被  
劫作南山猛虎行

南山虎北山盜行路難三河道三河健兒氣縱橫  
躍馬矢鏑鳴征車轉轉出官路官錢私錢走如驚  
官錢押解濟遼軍私錢興販資商賈河東一路村  
無烟枯楊荒草六月天車夫汗喘車輪折百里五  
十行不前霹靂一聲呼廣漠壯夫墮馬魂膽落止  
求買命不求錢官錢破櫝私傾橐何圖遼餉四千  
餘景州白日供搜攫刺史傾家上已空地方捕盜  
捕虎同

援兵謠

老翁卧牀覆牛衣老嫗當窓績繭絲小兒竈上戛金糜  
糜薄不克兒腹飢驚聞一聲叩門急彎弓帶箭橫躍入  
小兒哭走牀下匿曳翁下牀相煎逼驅嫗取火急烹煮  
東鄰買酒西鄰黍東西兩家各受兵一粒一滴不肯予  
老翁老嫗跪痛哭今日腹中昨日粥賣衣典袴止百錢  
獻與長官來折乾長官出門氣如虎走往前街尋大戶  
前街大戶緊閉門以石打破翻怒嗔直入卧內據牀袒  
妻女含羞各奔竄竈前火滅人影斷纔供醉飽一隊過

後隊又到須徵辦

登醫巫閭山絕頂挾一老僧以從放歌

神州五岳神所居遼西乃有醫巫閭長城不能斷地脈  
靈氣盤結東扶餘翠屏萬疊遮大漠危峰千尺凌清虛  
砂頭西奔似駭浪山勢北曳同衣袂石壁巉巖俯絕壑  
泉流滴滴下深渠鬣岡礪礪苦折屐鳥道盤屈驚摧車  
逶迤百折山之半別開一洞棲猿狙山樓突兀鑿新磴  
佛火荒涼依舊廬攀厓披棘上絕頂天風欲墮吹襟裾

何當一掃狼烟息山巔可勒燕然書

送茂倩姪官南水部歸省

悲哉是秋氣黯爾別銷魂九月黃花節三家白酒邨  
砧鳴驛夢曉笳動戰塵昏行矣東方騎高堂正倚門

清音閣同平仲夜話

平子吾宗望相逢此地遊湖山同是客雲物已先秋  
北嶺看松路西溪聽雨舟眼中惟爾我沉醉坐江頭

過大名舊城



日落征途訪故宮行人指點舊天雄  
女牆斷續牛羊下墟墓高低禾黍中  
漳水不堪添夜雨澶碑依舊立秋風  
古來河北關興廢一說干戈恨未窮

唐中翰袁抑辭講筵出佐浙  
齎戲贈鹽字韻一律  
并懷其二仲中甫熙甫

青案翻經職典籤亭亭玉樹謝家簷  
前籌借箸海為賦舊學調梅羹作鹽  
篋筆長騰池上彩賜衣猶翦尚方纈  
斷橋鴈影孤山月幾度懷人試卷簾

樓居春暮

春事初殘雨一犁豆苗瓜蔓長春畦客來烹茗供新水  
興到銜杯續舊題剩有圖書翻枕上總無亭館近灤西  
小樓日出朝眠穩為語流鶯莫亂啼

傅淑訓一首

淑訓字啟昧孝感人萬厯甲辰進士除知濮州  
調澤州入為工部員外進郎中出知平陽府升  
山西按察副使尋提督學政歷陝西參政四川

按察使遷太常少卿累遷戶部尚書

題香積寺

平甸草鋪似繡高峰石削如門牛羊十里五里雞犬前  
邨後邨

趙彥復 一首

彥復字微生杞縣人萬厯甲辰進士官至湖廣

按察副使有趙微生詩選

汪明生云微生古詩有河梁之遺響下亦

不失寶厯流風近體詞以興成格由骨振寧律不諧不使句弱

詩話微生牽絲作宰不以簿書廢吟咏晚輯李  
獻吉何仲默王子衡孟望之薛君采高子業劉  
子素張助甫謝茂秦九人之詩目曰梁園風雅  
而以已作附之以為獻吉籍本扶溝聚族於斯  
婚嫁於斯長子孫於斯營丘墓於斯非梁人而  
何君采之先出自偃師而隸武平赤籍茂秦為  
趙王客因卜居子孫遂留不歸鄴志載在  
流寓故亦入選中州之文獻得存其略焉

## 雨

高雲不可即飛雨作泥塗多難詩篇減新涼病骨蘇貧  
仍雞鶩食愚任馬牛呼往事庸堪問空嗟白日徂

黃儒炳 一首

儒炳字士明廣州順德人萬厯甲辰進士改庶  
吉士除編修歷右中允左諭德右庶子遷南京  
國子祭酒升吏部右侍郎轉左侍郎兼翰林侍  
讀學士有影木軒集

經始興江口

三楓亭下路不盡瘴雲鄉亂石千峰落斜階一水長樓  
船通漢將鏡吹發陳王往事東流盡棲鴉遍夕陽

汪輝一首

輝字德仲休寧人萬歷甲辰進士改庶吉士授  
編修歷官吏部左侍郎協理詹事府事

春日山行

過嬾倦官遊歸來且多務命駕偶山行始叶泉石趣入  
澗窮窈窕陟峰出雲霧細雨灑春寒輕風飄日暮俄為  
桑門訪忽值友生顧蔬酌供野興晤言寫情素高原恣  
遐眺幽徑暫閒步眷此永日歡信彼頽齡度城市苦氛  
囂誰能舍之去

周炳謨一首

炳謨字仲覲無錫人萬厯甲辰進士改庶吉士  
授檢討歷贊善諭德少詹事以禮部右侍郎協  
理詹事府事卒諡文簡

登雞鳴山寺

琳宮突兀雞鳴嶺極目風烟天地寬山疊亂峰來北岳  
水連千峽入桑乾誰人禾黍谿邊種幾處牛羊谷口看  
塞下只今歌樂業幕南昨日到呼韓

吳應琦一首

應琦字景韓桐城人萬厯甲辰進士歷官南京

大理寺卿

滇中有懷

南詔春深暮雨昏懷歸畏有簡書存三年雪鬢行荒服  
萬里冰心荅至尊永夜衰親頻入夢何時穉子一迎門  
龍眠櫻筍聞無恙短褐黃冠是主恩

劉士驥一首



士驥字允良禹城人萬厯甲辰進士改庶吉士  
授檢討有蟋蟀軒詩草

長陵陪祀作

赤縣歸真主青山鎖故宮玉魚沉永夜石馬立西風  
霜露秋容肅椒蘭祀典崇明裡鸞馭在濟濟駿奔同

過庭訓 一首

庭訓字爾韜平湖人萬厯甲辰進士除江陵知  
縣擢雲南道御史督學南畿遷江西參政轉福

建按察使升應天府丞有平平草

辛酉秋日游茅山

海內真靈居茅山踞如虎舊傳三弟兄各作一峰主  
仙人長往來華陽稱洞府百里借遊遨信宿樂茲土  
是時秋正清諸峰可歷數高觀揭天中時有白鶴舞  
地肺豈虛名真誥傳自古何當騎茅龍豈復戀圭組

魏濬二首

濬字禹欽松溪人萬歷甲辰進士除戶部主事

金剛經疏  
卷六十四  
歷員外郎中出為廣西提學僉事仕至右副都  
御史巡撫湖廣有峽雲閣存草

墟上詩 二首

箬簾雙放壟頭安却坐林邊解竹簟  
椶葉結衣慵避濕  
青紗裹額不愁寒  
萋根對語時還嚼  
車騎來過亦聚觀  
此去茅邨應未遠  
湍溪澀勒翠團團

紆迴巖徑轉嵯峨  
笑問蠻家第幾窠  
入市每衣芒屨布  
出門時唱浪花歌  
峒丁慣箬殲狐矢  
獐女能拋織貝梭

墟散盡投歸路去斷烟半隴罨荒蘿

沈 珣 四首

珣字幼玉吳江人萬厯甲辰進士授中書舍人  
選山東道御史巡按貴州尋轉福建參政歷湖  
廣按察使河南右布政司山東左布政使擢都  
察院右副都御史巡撫山東有淨華菴臺

詩話先伯祖贈尚書君與公為沈公分校京闈  
所拔其後申以婚姻公之曾祖漢正德辛巳進  
士伯位隆慶戊辰進士同懷兄琦琬從兄璟璜  
先後皆衣柳汁釋褐門才之盛甲於平江而子

姓繼之文采風流代各有集則尤世祿之家所  
難矣晚愛逃禪所至廨舍輒事埽除或笑以為  
傳舍何必乃爾公曰宛其死矣他人入室吾未  
見故廬非傳舍也其達觀如是詩頗圓熟略與  
兄弟  
雁行

春日懷長兄在燕

聞道幽燕地蕭條異故鄉  
沙昏天欲黑春半草猶黃  
馬足衝霜冷鴻聲聽夜長  
今宵千里月飛夢舊池塘

鄭州道中

鄭州城北水連空  
蘋葉荷花處處風  
無數沙鷗飛上下

馬頭彷彿見江東

江南春

繁花紅映赤欄橋  
楊柳新隄繫畫橈  
三十六陂春水碧  
滿船明月一聲簫

女郎綺生卜居江上

窈窕紅樓隔舊京  
重簾瑟瑟擁雕楹  
樓前咫尺官橋路  
認得蕭郎白馬聲

王象晉一首

象晉字子進濟南新城人萬厯甲辰進士授中書舍人遷禮部主事謫江西按察知事稍遷行人司副轉禮部員外歷郎中出為浙江參政官至浙江右布政使致仕卒鄉人私謚康節先生

### 言志

通籍三十年息肩猶未得靜中自尋思永夜勞轉側來日苦無多胡不惜筋力富貴如浮雲百歲猶頃刻世塗多險巇反覆無終極何不早挂冠戚友相親慙西塾課

免孫東臯藝黍稷早畢公家賦早完私家債濁醪聊適  
口麋糲堪供食八口可無飢四鄰好為德時而曳杖游  
時而曲肱息一事不縈懷兩耳常緊塞用以怡吾神倘  
徉華胥國

樊良樞 二首

良樞字尚默進賢人萬厯甲辰進士歷官廣東  
右布政使有三山二酉等集

暮春登滕王閣



江上春歸思渺然危欄百尺瞰寒烟美人南國銷芳草  
帝子東風怨杜鵑半嶺孤雲銜落照一颿遠水淨浮天  
月明十二樓頭曲夜夜吹簫到客船

登岳陽樓

楚館迢迢楚水長雨餘新漲下瀟湘九歌緩節迎河伯  
千古傷心弔國殤肉食幾人憂社稷野謀無計奠疆場  
衡雲莫障長安日搔首青天望帝鄉

祁承爍一首

承燦字爾光紹興山陰人萬曆甲辰進士授寧陽知縣調長洲遷南刑部主事轉兵部歷員外郎中出知吉安府京察謫沂州同知稍遷宿州知州入為兵部員外歷河南按察僉事副使江西右參政有澹生堂集

詩話參政富於藏書將亂其家悉載至雲門山寺惟遺元明來傳奇多至八百餘部而葉兒樂府散套不與焉予猶及見之其手錄羣書目八冊今存古林曹氏寺中所儲已盡流轉於姚江葉兒鄉矣

聞警

醫巫閭下水東流填盡枯骸剩作丘當局豈皆肉食鄙  
傍觀寧盡杞人憂既知殘奕惟爭劫坐視危樯欲覆舟  
可是樞臣饒遠策故將鎮靜作良謀

劉遵憲一首

遵憲字可權大名人萬歷甲辰進士除壽張知  
縣調滋陽升戶部主事累官兵部尚書改工部  
加太子太保有恕醉齋集

寄書兗曹修葺山居

自悔出山誤由來歸夢頻每看客邸月偏憶故園春鳴  
鳥驚時變叢荒著雨新可憐湖石畔只少白頭人

王湛求云

香山詩歌舞屏風花障上幾時曾畫白頭人惟白頭不入畫屏此湖石畔不可少也

凌漢卿一首

漢卿字峻卿長洲人萬厯甲辰進士除福清知  
縣選陝西道御史贈大理寺卿

詩話張子野吳興寒食詞中庭月色正清明無  
數楊花過無影余嘗歎其工絕在世所傳三影

之上詠梅者類取材於疎影暗香侍  
御獨以無影形容之亦奪胎法也

詠梅

玉蘂含風香苔枝帶霜冷夜靜月冥濛空庭卧無影

閻世科一首

世科字伯登太原人萬厯甲辰進士除湖州推  
官入為戶部主事歷郎中出知河間府轉布政  
司參議

楞伽臺

垂老投簪穩憑高對酒閒江風梳白髮海霧羃青山目  
極秋天遠身依莫鳥還禹功遺跡在千載喜追攀

劉允昌一首

允昌字燕及桐城人萬歷甲辰進士知宜黃臨  
川廣濟三縣遷南京大理評事歷官興化知府  
有遷草覲草遊草

潘蜀藻云廷評詩不假思索  
衝口而出往往有逸氣間似

香山

增城流杯石

增江有怪石形容類虎丘亦可坐千人而多巖厓幽曲  
澗自天成或云鬼斧修仰承千丈泉驚湍變安流土人  
不好事經年罕來游我行及暮春風日妍且柔結伴得  
數子大半高陽儔脫烏坐曲澗杯盃任所投欲去忽復  
往將沉還能浮徘徊若就人想為知己留觀者盡拍手  
我意徒夷猶歎息下山去空坡驅羊牛

范汝梓一首

汝梓字君材鄞縣人萬厯甲辰進士除工部主

事謫酉陽宣撫司經歷累遷任襄陽推官入為  
刑部主事歷員外郎中出知延平府拾遺謫襄  
陽同知尋守襄陽卒于官

采蓮曲

風吹荷葉十里香采蓮女兒矜豔妝  
櫂聲驚起雙鴛鴦  
雙鴛鴦何處宿白蘋灣紅蓼谷

戴耆顯一首

耆顯字令微桐城人萬歷甲辰進士禮部主事




有梳河集

南旺湖

古為陸地  
云即大野

異代南湖水猶存大野名秋風一夕至蘆荻有餘清蕩  
堤淨微茫入檻明時時陰雨裏髣髴魯諸城

明詩綜卷六十四



總校官庶吉士

臣

張能照

校對官編修

臣

閔惇大

校對官庶吉士

臣

嚴

福

謄錄舉人

臣

嚴

儀

謄錄監生

臣

蔣大鎔

欽定四庫全書薈要

集部

明詩綜卷六十五

六

臣沈初詳校

詳校官編修臣汪鏞



欽定四庫全書薈要卷二萬五百三十八

集部

明詩綜卷六十五

翰林院檢討朱彝尊編

李流芳十一首

流芳字長蘅嘉定人萬厯丙午舉人有檀園集  
山中喜張魯生至同尋熨斗柄坐湖邊竟日而還  
偶作

貪游不知止足力疲屢試起晚日當午偃曝聊自恣忽

聞故人來發我湖上意出門何翩翩兩足殊快利嘗聞  
熨斗柄頗怪此名異昔年過其下髣髴已忘記今日天  
有風湖山想奇致相與歷西磧山窮見湖勢沿流正縈  
紆撫石得小憩飛湍擊嶂竦壁立聳肩洗出如削成  
斗絕畏崩墜閃爍絢丹堊剝落疑文字傾厓側足過陰  
壑綠藤縋燕磯與鼉渚生平快游地遂擬兼勝槩恍忽  
理夢寐高歌遏水聲浩蕩入胷次吾欲乘長風悠然向  
天際惜哉多舟楫使我不得濟

過皋亭龍居灣宿永慶禪院同一漁澄心恒可上人步月

每多方外游見僧即如故燈明一龕下夜長愜深悟不  
知山月上千林已流素出門尋舊蹊愛踏松影路幽泉  
洗我心微鐘杳然度

戲示山中僧侶

山居不須華山居不須大所須在適意隨地得其蹊高卑  
審燥濕涼燠視向背樓閣貴軒翥房廊宜映帶或與風月

通或與水木會卧令心神安坐令耳目快皋亭美林壑中  
塢亦稱最一樓負山立圭竇如向晦山僧請余住余性苦  
不耐勸令開八窓吐嗟變湫隘前楹布清陰後戶攬蒼靄  
玲瓏稱人意蕭爽出塵界蹶然謂山僧此中固有解往往  
住山人不知山好在我昨居新菴結構亦可怪居然仇涼  
風似欲杜靈籟古梅如老宿亭亭使人愛其下安竈突柯  
條半焦壞悲哉冰玉姿坐受熏灼害見之熱五內如身被  
桎械誰當共拯此移竈出樹外面南闢小扉日與香雪對

區區一緡費功德及萬倍吾言不見用終為未了債  
訪秦心卿溪上嬾園不遇有作

溪上好園亭君家聞最勝經過已廿年今始識三徑翳  
然臨水間愛此飛閣映位置不在多貴與風物稱主人  
意疎豁事事得真性我來不相值維舟柳邊暝見戴自  
無須悠然發孤詠

贈別洞庭葛實甫

我懷洞庭月欲醉莫釐峰幽意久不愜高人今乍逢新



詩正堪把歸櫂阻相從却羨秋山下丹黃已萬重

黃河夜泊

明月黃河夜寒沙似戰場奔流聒地響平野到天荒吳  
會日以遠燕臺路正長男兒久為客不辨是他鄉

訪慧法師於皋亭桐塢作

不見皋亭慧法師每勤書札慰相思蹉跎又作三年別  
慙媿終無一往時忽憶虎溪成舊社且尋茅屋賦新詩  
關門短櫂衝炎去黃鶴峰頭月上遲

元夕雨邀里中諸君小飲檀園燈下次伯氏韻

花邊樓閣月邊廊更愛繁燈照夜光  
雨氣無端先客到檐聲應為和歌長  
城頭結綺人俱散邨裏迎神鼓不忙  
且盡一杯酬令節泥深門外亦何妨

為陳維立題輞川畫

吾愛華子岡輞川流日夕如何舍此去  
傷心賦凝碧雨中看梅西磧即事

邨園門巷逐花低  
藤蔓桑條咫尺迷  
花底泉聲認歸路

沿流直到石橋西

題畫似雪嶠師

千峰頂上只通雲一水人家別有邨  
直到前山蘭若路  
清鐘落日不逢君

成靖之一首

靖之初名基命字莖于大名人萬歷丁未進士  
改庶吉士授編修累官吏部侍郎進尚書入東  
閣加太子太保禮部尚書文淵閣大學士贈太

保謚文穆有雲石堂集

送劉紫芝南還

遠別人情惜君歸更若何  
匡時憐道直涉世患才多  
路柳催春去江風拂櫂過  
還應逢雨露且莫怨蹉跎

錢龍錫二首

龍錫字稚文號機山松江華亭人萬歷丁未進士授編修歷中允諭德以少詹掌南京翰林院升禮部尚書東閣大學士召進文淵閣加太子

太保致仕歸尋逮繫詔獄論斬得釋戍定海衛  
久之還里卒于家有兢餘存橐

靜志居詩話公始入閭思陵命定附魏璫諸逆  
臣案出黃羅囊示之且曰忠賢一豎何能為皆  
外庭力為諂諛至此囊中章疏悉媚奄人實蹟  
也公乃取以論罪分別重輕凡六等又慮罪人  
狡辯因請於諸臣姓名下各注所犯俾服其心  
逆案既定黨人銜怨刺骨袁崇煥經略遼東入  
見帝大言期以五年奏功公疑焉退而詣之曰  
子方略將何如對曰不外東江關寧兩路進兵  
爾東江者島帥毛文龍也公曰舍關寧實地而  
問海道何與對曰譬如奕然局有四子東江其  
一也可則用之不可則有以處之崇禎二年五  
月崇煥行邊至雙島台文龍至以餉金十萬犒

其師自與文龍登舟相視山海形勢酒間勾隊  
島帥麾下以邊警報者踵至崇煥乃疑曰吾軍  
亦有偵探卒何以不一至此連吾行爾起數其  
跋扈拔尚方劍斬之聲其罪置帥而返全軍莫  
敢譁也及大安口失事都城被圍崇煥勤王師  
至廷臣多言崇煥之殺文龍陰為主款地思陵  
大疑尋有旨俾縋城入下之獄訊叛狀於是御  
史高捷劾公與袁同謀崇煥既誅御史史堃劾  
公逮繫詔獄論斬有司設厰于西市將用夏言  
故事既而緩決左中允黃道周給事中劉斯璫  
先後為公訟冤得釋戍定海衛居戍所九年乃  
還崇煥之死詳載本朝實錄操史筆者不可  
不知

# 初入翰林述志

皇風被奕葉師濟協重熙妙選金閨彥登茲白玉墀  
慚予蹇劣士何幸沐恩私就將彌日月摹範承師資雕蟲  
既云拙溫飽匪所思獨此葵藿心耿耿誓不移念昔皇  
祖日講藝恒孜孜天顏瞻咫尺密室奉疇咨袞德信多  
補臣忠實在茲顧問久寂寞簪笏徒委蛇四郊漸多故  
啓沃効者誰所願回宸照堂廉路不岐

題幽風七月圖

國本民生繫深思草昧存淳風懷瑾戶美俗寫朋尊卜

洛從何始承邵信有源艱難開聖主告誡切文孫拭目  
丹青麗賡歌雅什溫思隨工瞽誦欣望闕虞門

楊連一首

連字文孺應山人萬歷丁未進士除常熟知縣  
徵授戶科給事中歷禮科都給事中升太常少  
卿擢右僉都御史進副都御史死璫禍贈太子  
少保左都御史諡忠烈有集

詩話六君子被逮周袁顧三公以五月到北  
司魏楊左三公以六月到北司比較之日六



君子伏檐溜下楊居中左居楊之左魏居楊之  
右顧居魏之右周居左之左袁居周之左許顯  
純初猶作爾汝稱旋竟呼名叱咤獄吏有稱犯  
官者顯純怒罵曰此等犯人爾何官之有其刑  
具有械有錄有棍有桡有夾棍遇比較流血灑  
地楊左魏三公先斃次袁次周次顧投繯而逝  
是年六月詔獄土地祠前樹下生一黃芝六君  
子至日光彩映人環視適六辨見者疑吉兆顧  
公歎曰芝瑞草也而生于獄其妖乎未幾六君  
子皆斃于獄楊公之歸櫬也負以二騾其子及  
一二蒼頭徒跣道上  
行路皆為飲泣云

### 題柏子園青芸閣

官閣凌空汶水深金甌初動客登臨浮雲易改三山色

落葉先驚萬里心  
江上美人遺雜佩  
城南少婦拭清砧  
繁臺兔苑今禾黍  
日暮憑闌思不禁

左光斗一首

光斗字共之桐城人萬厯丁未進士授中書舍  
人擢浙江道御史升大理寺丞進少卿終左僉  
都御史死璫禍贈太子少保右副都御史諡忠  
毅有集

詩話萬忠貞之死忠毅哭之以詩有云我有白  
簡繼君何能已與君同游杖下矣丹心留在天

壤間默默之生不如死是亦不媿其言者也詩  
多晚唐風韻如濕雲留野樹晴雪照征衣凍犬  
迎人返飢鳥下食齊一觴邀老友隨意發新歌  
過雨煤錢長將炎水價添野牆藤益瓦邨落樹  
為橋問節驚初度思親改歲華疲驢衝道  
路破帽出都門宛然鄭都官姚少監遺格

憶龍眠山居

卜築傍龍眠雲深一徑穿源窮纔見屋山盡忽開田芋  
栗新栽得芻蕘任往焉笑余緣底事一別動經年

顧大章一首

大章字伯欽常熟人萬歷丁未進士除泉州推

官改補常州府學教授稍遷國子博士轉刑部  
主事歷禮部員外郎出為陝西按察副使被逮  
卒于獄贈太僕寺卿諡裕愍

詩話楊忠烈攻魏忠賢人疑具草者繆文貞王  
莊毅攻客氏人疑具草者顧裕愍此兩公所以  
不免也裕愍與弟大韶仲恭時  
義妙絕時人詩特具體而已

被逮道經故人里門

檻車塵逐使車轅一路知交盡掩門猶喜多情今夜月  
斜窺樹隙照離尊

李標一首

標字建霞高邑人萬歷丁未進士改庶吉士除  
檢討累官太子太保禮部尚書文淵閣大學士  
題梁慎可墨香亭

古樣蕉衫白接羅芳亭長日坐支頤焚香自悟無生訣  
拈筆閒摹有道碑竹韻松濤清自遠花觚茗盃靜相宜  
近來愛寫黃庭否好換新鵝浴小池

許令典一首

令典字稚則海寧人萬厯丁未進士官至淮安  
知府有靈泉羸史集

詩話稚則一官不達意薄淮陽散髮歸田陶潛  
之屋不豐范蠡之舟偏小籃輿竹杖紙帳繩牀  
雅饒樂趣所云愛官何似愛吾廬也詩  
取適意無意求工蓋本於香山擊壤

題陳平叔陋巷

狹巷難容旋馬小池也愛籠鵝客來兒子教揖興到老  
人自歌

馬德澧一首

德澧字以容平湖人萬歷丁未進士改寧國府  
學教授入為國子監博士遷刑部主事歷郎中  
卒贈太常少卿

曹園讌集

名園成勝引畫檻出疎籬不厭杯頻勸何妨席屢移暮  
煙停客櫂宿雨亞花枝興劇忘歸去娑拖月上時

鄒維璉六首

維璉字匪石江西新昌人萬歷丁未進士除延

平推官徵授南京兵部主事歷員外郎中改吏  
部坐削起南京通政司參議遷行太僕少卿以  
僉都御史撫福建終兵部右侍郎有願學編官  
游友白尊噫等集

述懷

羶塗難久居盛名寧久留所以鵠尸子五湖一扁舟應  
無雄辨士俯徇燕客求四時忌成功急湍無安流美服  
人所指權利倍添憂



古意

百年苦瞬息人事復乖違園中桃與李安能久芳菲天  
風埽枯葉北鴈忽南歸嗟我行役人年年戌金微感稟  
自西來游子未授衣嚴霜墮關塞明月照孤幃兩地共  
搖落兩情共欵欵

秋興

鵲巢得腐鼠輒以嚇鷓鴣鷓鴣飲清露高飛棲碧梧飄  
然樊籠外野性常自如鵲巢即飽食能無畏張弧古云

鹿生山命已懸庖厨達人訪物理深藏賦遂初

初至夜郎

遠戍天涯事可悲疎狂真負聖明時誰言鴻鵠能千里  
差喜鷓鴣託一枝草野數懸丹闕夢鄉園空望白雲垂  
高山流水情堪詠已擬埋名老下帷

閨怨

妾恨憑誰寄君懷祇自知堂前雙燕子歲歲赴春期

陌上偶成

青青道傍柳轉眼忽成圍男兒客他鄉不知歲月非

徐從治一首

從治字肩虞海鹽人萬厯丁未進士除桐城知縣改武學教授轉國子助教遷南禮部主事歷郎中出知濟南府以山東按察副使分巡兗東以布政司右參政分巡濟南加右布政使請告歸起薊州兵備道尋加左布政使復移病歸再起山東武德道兵備起拜都察院右副都御史

巡撫山東萊州被圍中飛礮死事聞贈資善大  
夫兵部尚書賜祠曰忠烈有集

詩話徐公平白蓮賊擒其魁徐鴻儒脅從四萬  
六千餘人悉赦罔治其奉命填撫山東詔駐青  
州而公以叛軍將掠萊州特與防撫謝璉治守  
城具三宿而寇大至固守七月為礮石碎顱殞  
于城上合手以死勤事之祀典矣公孫曰全曰  
令均有文采以公遺詩三篇見示因錄其一反  
覆誦之不異張中丞接戰春來苦孤城日  
漸危裏瘡猶出陣飲血更登陴之句也

入萊州城被圍作

崇禎五年春帝命師中錫俾撫大小東星言事羈勒於

時二月朔告警馳羽檄叛軍無安巢掠地恣所歷萊牧實  
要衝羣兇首矍踴雖有防守臣蔽甲同袒裼詔許駐青州  
欲往寸心怒萊民亦吾民不忍付焦溺單車指危邦夫豈  
尚沾激須臾寇果臨疾風走沙礫孤城露南隅三面受鋒  
鏑雲梯匪一層地道發重甃捷如猱升木多於蝥緣壁穴  
以穢熏尸臺縱火燔荻相隨八十騎騎奮長矜自顧一  
書生乃當萬人敵援兵絕虬螭礮石轟霹靂誰與生厲階  
失計遂貽感一星燄不撲燎原衆斯惕兩葉生不除須用

斧柯析奈何肉食謀議撫不議擊養癰久必潰累卵危終  
殞哀哉此邦人何讎委虺蜴效死職所甘智已窮墨翟

沈聖岐二首

聖岐字千秋烏程人萬厯丁未進士除工部主  
事歷員外郎中出知濟南府

送閔昭余出守漳南

閩南虎竹三千里茗水漁村二十年別後相思夢何處  
刺桐花發海雲邊

即事送吳翁晉

百尺飛絲送柳花青春欲暮未還家揚鞭忽到鳴箏處  
一笑初停白鼻騮

錢文薦二首

文薦字仲舉慈谿人萬厯丁未進士知新野宜  
春二縣入為工部主事有麗矚樓集

詩話仲舉論詩升少陵於堂置之首座青蓮次  
之高岑王孟又次之餘子隅坐侍酒而已自謂  
吾輩於此不可不占一坐否亦須坐兩廡中聆  
鐘磬管絃之盛然觀其製作未免懦鈍譬之於

樂僅比於机杼控揭焉爾至駁顧茂齊謂少陵  
詩窮後工以為非是詩至少陵窮固工不窮亦  
工也斯  
言得之

### 月下懷馮正子太史

夜坐林木清見此池上月羣峰忽已淨孤雲澹將沒愁  
深白鷺渚夢斷蒼龍闕望望曙河遥思君不可越

### 山居雜興

自埽閒房卧能令俗慮輕披簾邀乳燕挈榼赴遷鶯海  
味梅魚滑山毛竹筍清湖天思盪槩恰喜報新晴



趙

涵一首

涵字子函一字屏國蓋厓人萬厯己酉舉人

詩話子函好古撰石墨鐫華關中金石  
藉其題識詩不見醜尚存康王遺格

茂陵

黃山歷盡見孤城城上樓高眼倍明  
芳樹寢園今北望暮雲宮闕舊西京  
芙蓉晝冷仙翁露首宿春閒宛馬聲  
回首長楊誇獵地何人得似子雲名

韓

敬一首

敬字求仲歸安人萬厯庚戌賜進士第一授修  
撰尋謫行人司副

題南陔山房

碧山初築澗之濱選石疏池位置新坐守庚申偕道士  
橋名丁卯續詩人深情只託支頤笏時樣爭傳墊角巾  
縱是漁師魚不賣暇從秋浦戲垂綸

張慎言一首

慎言字金銘陽城人萬厯庚戌進士官至吏部

尚書有泊水齋集

詩話尚書雖歷崇階傾心下風雅之士聞詩人陳昂捆屨布卦卒窮以死語所知曰自今入市門見賣菜傭皆宜物色之恐有如白雲先生其人者嗚呼今人論撰述率先揆其仕路之通塞以定文字之佳惡取舍由茲分焉  
江河日下安得聞此長者之言

過洹水將入里有懷長安故人

洹水纔過丹水流客愁爭似水悠悠汀洲綠映征袍淺  
桃李香迎語鳥柔耽靜計將書卒歲懷人豈但日三秋  
歸來鄉里都如故晚計方思馬少游

丘兆麟一首

兆麟字毛伯臨川人萬厯庚戌進士除行人選  
授雲南道御史升太僕少卿以右僉都御史巡  
撫河南有玉書庭集

洸河

四月洸河濱運艘千百檣我舟銜尾來偶與同起止八  
牕閉九日一旬得百里前途牕更繁閉者轉難啓轉漕  
四十斛至僅一石爾庶土勤輸將咽喉實在此一夫若

當闕萬夫不足恃意外事未然平陂亦物理君相共策  
籌庶乎消不軌

文翔鳳一首

翔鳳字天瑞西安三水人萬厯庚戌進士除萊  
陽知縣調伊陽再調洛陽遷南禮部主事調吏  
部升山西提學副使入為光祿少卿有伊川海  
日雲門諸集

詩話學有異端詩亦有異  
端文太青王季重是已

望唐陵

北望唐家十八陵寢園貴主亦相仍  
惟將憲廟除樵採不為明皇具禴蒸  
幸蜀山川幾板蕩平淮天地再清澄  
奉先橋首堯山好柏路遐探憾未能

鍾

惺四首

惺字伯敬景陵人萬歷庚戌進士除行人升工  
部主事改南京禮部主事進郎中遷福建提學  
僉事有隱秀軒集

詩話禮云國家將亡必有妖孽非必日蝕星變  
龍釐雞禍也惟詩有然萬歷中公安矯歷下婁  
東之弊倡淺率之調以為浮響造不根之句以  
為奇突用助語之辭以為流轉著一字務求之  
幽晦構一題必期於不通詩歸出而一時紙貴  
閩人蔡復一等既降心以相從吳人張澤華淑  
等復聞聲而遙應無不奉一言為準的入二豎  
於膏肓取名一時流毒天下詩亡而國亦隨之  
矣

再登浦口王茂才山樓望石武庫澹寧所造新城  
水上樓居忽有城重來翻覺類新成鶯花每次逢長夏  
風日無端屬乍晴山對層楹還自若江添睥睨倍多情

亂帆屢向烟邊沒去遠參差却漸生

舟晚

舟樓頻易處水宿偶依岑岸暝江逾遠天寒谷自深隔  
墟烟似曉近峽氣先陰初月難離霧疎燈稍著林漁樵  
昏後語山水靜中音莫數歸鴉翼徒驚倦客心

送丘長孺赴遼陽

曲突何曾勸徙薪烽烟桴鼓重邊臣全遼三五年中事  
爛額焦頭半楚人



桃源詞

商山海上半秦民何獨桃源是避秦  
滿洞仙人一漁子翻疑漁子是仙人

王志堅一首

志堅初字弱生更字叔士崑山人萬厯庚戌進士授南京兵部主事歷郎中以按察僉事提學貴州不赴再起提學湖廣卒于官有香巖室草

寄長蘅

吾觀仕宦人每每念丘壑雖復非真實茲意或間作譬  
如酒食困番思茗飲樂病苟稍稍去旋復恣饒嚼嗟余  
困折久本自甘獲落茲游非得已黽勉就人爵人生能  
幾何胡為久熏灼寧為沙上鷗毋取籠中鶴

尹嘉賓 二首

嘉賓字孔昭江陰人萬歷庚戌進士授中書舍  
人升兵部員外出為湖廣提學副使有焚餘集  
舟泊惠山夜坐思琴

昔年與之子把酒對瑤琴明月蒹葭浦秋江楓樹林  
擣衣中夜緩落葉萬山深悵矣誰能理烟波不可尋

江上雜詠

河豚雪後春還淺刀鱗風來水已波攜酒江邊吹笛坐  
看山何處出雲多

莊起元一首

起元字中孺武進人萬歷庚戌進士除浦江知  
縣調蘭谿遷南戶部主事歷員外郎中出知撫

州府官至太僕少卿有漆園卮言

紫霞洞

石室何寥廓蜿蜒信地靈洩雲終古白  
艷草自然青軒  
帝藏神鼎淮王貯道經翛然來物外思鍊羽人形

鄭之文一首

之文字應尼南城人萬厯庚戌進士授南京工  
部主事歷郎中遷知真定府有遠山堂錦硯齋  
集

金陵元夕

花下燈前出畫裙  
衣香一路暗氤氲  
不知南陌人如月  
但道東門女似雲

王象春十首

象春字季木濟南新城人萬厯庚戌進士除上  
林苑典簿遷南京大理評事歷工部員外改兵  
部終吏部郎中有問山亭集

詩話萬厯中年詩派雜出季木自闢門庭不循  
時習雖引闕中文天瑞為同調然天瑞太支離

未免邪徑害田矣未若季木之無戾羣雅也題  
項王廟壁一篇比於謝參軍鴻門作更覺遺鍊  
亡友潁川劉考功公馘亟賞之幾於  
唾壺擊缺此非邪師外道之傳也

### 山老鴉

山老鴉朝東暮還西過河拾杜梨日晚腹飽不歸去矰  
繳已伏河邊樹爾腹已飽爾不知飽人之腹良足悲

### 打棗竿

打棗竿光瑩瑩

廣韻永兵切

岸上小兒赤身擎去而復來無

時停終日剥啄不盈升低枝已盡高枝熟我竿恨無三

尺六

空城雀

空城雀飛且止不營棲巢不哺子相呼莫向網羅死

書項王廟壁

三章既沛秦川雨入關又縱阿房炬漢王真龍項王虎  
玉玦三提王不語鼎上杯羹棄翁媼項王真龍漢王鼠  
垓下美人泣楚歌定陶美人泣楚舞真龍亦鼠虎亦鼠  
送友人

郭外溪邊寺年來兩送行攀條猶在眼落葉已無聲憶  
昔春山色能輕故國情好將詩酒約歸問魯諸生

謁岳武穆廟

衰草寒烟日暮時傷心瞻拜岳王祠君王自得偷安計  
臣子應班痛哭師東海未填精衛死南風不競杜鵑知  
由來和議非長策千古英雄恨莫追

硤石懷古

即嶠陵

真成箭括與車箱猶是千年古戰場想像國殤思蹇叔



時因風雨憶文王楚人一炬曾經入薊馬長驅亦未防  
三復青蓮蜀道曲休令所守化豺狼

石城月

金陵王氣未曾消水泊秦淮江上潮月到石頭城下好  
碧雲紅樹聽吹簫

山家

山家香穠飽椿芽雨歇籬傍自種花割麥績麻旋剥棗  
一年三度坐牛車

不落夾

慈寧宮裏佛龕崇瑤水珠燈照碧空四月虔供不落夾  
內官催辦小油紅

馬之駿 三首

之駿字仲良新野人萬歷庚戌進士除戶部主  
事歷員外郎中降廣德州同知升應天府通判  
調順天尋復官戶部主事終員外有妙遠堂集

詩話仲良才頗縱  
橫微嫌圭泰未合

十方禪院

何處堪消暑非山即水鄉樹深渾欲暝花近反無香欲  
晚波難綠迎秋木漸蒼市譁原未遠烟景乃微茫

秋日草橋作

白屋邛邛度青帘面面迎野溪殘雨入側樹早陰生  
梨棗過橋色雞豚近市聲未論丘與壑出郭已多情

送劉四

別酒呼還輟欸歔百感俱兩年何事隔明日此身孤秋

水殘城郭清霜點驛塗故鄉歸總好高會復能無

陳翼飛十五首

翼飛字元朋平和人萬歷庚戌進士除宜興知縣被劾歸有慧閣長梧二集己未庚申辛酉壬

戊行卷

詩話元朋牽絲百里遽挂彈文坎壈終身賴詩篇以陶冶集甚繁富幾與明卿伯玉爭多史取一編惜乎未就觀其解組記自述與韓求仲偕游金山有詩僧慧秀攜沈孝廉虎臣札來謁韓中稱引宜興吳徹如觸韓怒嫚罵吳不絕口以慧秀詩挂松枝上斥而遣之慧秀訴之於吳時

沁水孫尚書居相以御史督運漕吳噉孫劾之  
代為草奏辭連鄒臣虎湯嘉賓黨禍既成元朋  
一跌遂不復振矣求仲臣虎元朋皆同籍而列  
朝詩槩削去不錄嗚呼桑海既遷猿鶴沙蟲悉  
化而唯黃藝苑者黨論猶  
不釋于懷可為長太息也

### 齋居

白水浮官舍青山塞縣門案頭塵未積塵尾禿猶存  
莽雲中樹蕭蕭雪後邛齋居春事少農務與誰論

### 溫陵道中

九日山前路登臨病未能烟蘿從晶晶雲樹幾層層  
豹

犬柴門月人魚海市燈不堪聞杜宇匹馬過溫陵

帳望

寂寂何多緒憑高魂易銷疎鐘蕭寺雨遠樹海門潮  
秋月七千里春風廿五橋愁來頻徙倚躡破小山窰

大湘灘

遮莫上瞿塘灩澦大如象不見建溪石連亘三千丈

甘露寺

山色乍有無江光透明滅夕陽大道傍行人讀殘碣

清湖舟中

枯柳霜中鵲長烟雨後山人來吹笛罷獨立碧溪灣

落星石

白榆何夕墮危石青如此疑是酒星沉渴飲湖中水

馬當

廟鼓持芭舞蠻歌日易斜分風能送客不忍打神鴉

檀公壘

故壘青仍在符鳩白不飛長城他日壞衰草夕陽歸

橫江館

橫江館外雲津吏莫東指但為放舟行風波日如此

赤欄湖

朝泛赤欄湖暮宿黃金浦多少采菱船來問襄陽估

武昌西門

郎採白蘋花儂開青箬酒夜宿武昌城朝折西門柳

上元夜別

金鴈鼓斜記昔年輕攏慢撚最堪憐四條絃索無端絕



一夕春風也颯然

荔支詞

梧州四月火山紅南海丹時黃雀風不及閩中焦核好  
定應饒殺葛仙翁

無題

二月長安醉是鄉青樓繫馬拗垂楊可憐韋曲花如錦  
惱殺相思賀二孃

賀萬祚一首

萬祚字孝延嘉興人萬厯庚戌進士授刑部主  
事調南禮部轉郎中再調兵部出為山東提學  
副使歷福建參政廣西按察使以江西右布政  
使分守嶺北道有大業齋集

陳孟常云孝延詩  
寫情性質有其文

### 周侍御行部

蘭臺使者舊知名攬轡從容江海情抗疏共看任伯雨  
行軍還擬趙營平五花驄馬巡周道三輔黃圖歷漢京  
不獨艱危憂水旱前籌更欲請長纓

朱大啟 四首

先伯祖字君輿別字廣原萬厯己酉以秀水籍  
順天鄉試中式庚戌賜同進士出身除南昌推  
官擢吏部主事歷員外郎中崇禎初升太常少  
卿轉太僕卿再轉大理卿遷刑部左侍郎贈尚  
書有曼寄軒集

詩話東漢風俗之厚期功之喪咸得棄官持服  
如賈逵以祖父喪戴封以伯父西鄂長楊弼以  
伯母繁陽令揚君以叔父上虞長度尚以從父  
渤海王郎中劉衡以兄思善侯相楊著以從兄

大常丞譙玄槐里令曹全以弟廣平令仲定以  
姊王純以妹馬融以兄子皆以憂棄官輕舉至  
晉而嵇紹拜徐州刺史以長子喪去職陶潛以  
程氏妹喪自免作歸去來辭自是而後古之道  
莫之行也先伯祖掌銓東曹聞先文恪公之訃  
請于朝乞歸持服德陵允焉當時典禮者亦不  
以為過斯國史所當附書于禮志者先文恪公  
以宰輔歸所遺者僅墓田七十畝耳先伯祖五  
倍之恒曰吾官階三品而恒產倍蓰於保傅矣  
死何以見叔父於地下乎鄉黨傳其言數清門  
者必先吾朱氏焉先伯祖晚愛結方外社與秋  
潭萍蹤雪嶠諸法侶游更唱迭和故曼寄軒集  
禪誦之言居多

良鄉除夕

時改歲元旦崇禎  
紀元是日立春

古驛逢今夕他鄉對故人  
椒盤囊底舊霜鬢客中新  
守歲剛辭臘乾元早布春  
聖恩方浩蕩何必歎風塵

經海印廢寺

我行海子橋不見鏡光閣  
惟有青蓮花涼風吹又落

自信州還貴溪

小艇恰容膝輕帆下溜灘  
忽聞津吏語斜月挂江干

黃巖道中

萬樹梨雲白滿山  
桃花幾點破紅顏  
春風盡日黃巖裏

數遍峰頭不肯還

郭忠寧一首

忠寧字蓋卿吳縣人萬歷庚戌進士除刑部主  
事歷郎中改工部出知河南府調台州道湖廣  
按察副使終陝西右參政有也園詩藁

渡江

飄然一櫂泝空明日午春潮尚未生回首江南增客戀  
新晴鐘鼓潤州城

崔世召 二首

世召字徵仲寧德人萬厯己酉舉人知連州有

秋谷集

詩話崔君令巴山有為魏璫祠請頌德詩者峻  
拒之遂被逮入都下獄崇禎初釋還補官桂東  
尋司浙中餼務詩  
頗清徹無塵坌氣

昔昔鹽

妙舞低垂手聽歌昔昔鹽  
閨人雙淚迸遊子五湖淹  
水餞春漸去堦延月影潛  
嬌鶯藏樹澀弱柳覆堤纖  
西舍

徵簫板東鄰豔鏡匿燈孤煤漸別被冷夢難慙鴈過衡  
陽斷雞催鼓角嚴碧桃花又落蒼蘚逕仍添帶減驚投  
玦釵塵罷卷簾從來音信杳怕問卜書占昔昔曾相約  
頻將舊語拈

重九章江門守風有賦

時將  
被逮

黑雲照空秋氣昏章江城外逆水渾封姨鼓浪掀江豚  
招招舟子亦銷魂酒罷問天天不言野雞午叫黃花村  
誰家買醉登高原我已挂冠君落帽擢髮數罪難具論



孫元化一首

元化字初陽蘇州嘉定人萬厯壬子舉人從軍  
贊畫由兵部司務進職方主事天啓末閒住崇  
禎初起武選員外郎歷官都御史巡撫登萊吳  
橋兵變坐失事論辟有水一方人集

詩話初陽忼慨從軍歷三獨坐當崇禎初環召  
有兩頭蛇見里居樂在堂之南軒賦詩而行詩  
中自況卒成妖讖其外孫侯開國語余公  
遺集凡百卷詩僅存數篇錄之以當志怪

兩頭蛇

吾聞兩頭蛇其怪不可弭昔賢對之泣而我翻獨喜喜  
者意云何以我行藏似蜿蜒不留停奔赴孰驅使當南  
更之北欲進掣而止首鼠兩端乎猶豫一身爾蛇也兩  
而一相牽無窮已混心腹腎腸各口頰脣齒畢生難並  
趨終朝不離咫伸屈匪自甘左右何能以豈不各努力  
努力徒縈系殺一誠便一一殺一亦死兩存終奈何聽  
之造物理

卓爾康 一首

爾康字去病仁和人萬厯壬子舉人有修餘堂

集

詩話去病康濟之才著書等身  
惜不甚傳詩特霧豹一斑爾

初晴許元昭招看吉祥寺梅

言別長干久相思積雨重忽驚梅藥發如與故人逢入  
寺幽香繞方春冷豔濃憐君疎傲似相對益情鍾

李衷純

七首

衷純字玄白嘉興人萬厯壬子舉人選授如皋

知縣升南工部主事轉兵部員外出知邵武府

終兩淮鹽運使有激楚齋草

黃貞父云玄白詩博通而裁練藻麗

而瞻達上湖建安下逮大厯可稱通才 李本寧云玄白為如皋令治聲冠於江北文學政事

四科遂居其二 陳孟常云玄白才高學博千言不厭其多

詩話都運少以詩文受知於王元美元美集中載有贈詩既而上交郭美命從游葉進卿東林諸君子目以俊及筮仕雉皋特多惠績立碑頌德者如林蓋循吏也吾鄉戚尚寶元佐撰構李往哲傳語焉勿詳近項明府王筍續之繼使之治績闕而不書慮舊聞之放失附識於此

## 古別離

長安百尺樓其戶銜明璫峒堯入雲中雙闕遙相望明月照玉顏皎皎流素光中夜理瑤瑟纖指發清商初彈雙黃鵠再彈孤鴛鴦淒颼動羅帷餘響激微霜仰視河漢直寒波浩無梁安得高飛翼為君凌空翔

春懷

貔貅十萬下遼陽經略專征有侍郎殺氣正殷箕子國捷書空奏日南王蠻天轉餉愁中絕異域孤軍蹈險亡何似乘機歌杜壁堅青海制扶桑

登岱

層巒絕巘轉氤氲倒影凌虛日觀分方詫河山同帶礪  
忽驚噓吸總風雲珮環神女青霄度陸博仙人洞府聞  
聖主明堂知欲啓將無重過稷丘君

送陳孟常太史奉使還朝

春風楊柳拂雙旌使者星輶返玉京一詔責躬憂漢主  
九天持節識長卿花深禁苑分仙露月落宮城聽曉鶯  
還念東南民力盡好從講幄達承明

浦口道中

今年十月氣尚暖江北宛似江南天未彫楊葉黃冉冉  
欲吐麥苗青田田老農築場放犢卧少婦壓槽呼客前  
長塗風景亦不惡馬蹄且踏寒雲穿

雨後

夜靜空山中鳥鳴知雨歇寂寂啓寒扉林端澹疎月

順昌道中

山如眉黛水如羅谿上人家繡戶多十五小姬催客酒

銀箏彈出伯勞歌

吳伯敷一首

伯敷字同文宣城人萬歷壬子舉人

燕子磯同梅禹金作

江落鮫人窟磯傳燕子名濕雲拋雨散涼月帶潮生白  
浪浮虛閣青山挂斷城知君有高調流水若為生

李孫宸一首

孫宸字伯襄香山人萬歷癸丑進士改庶吉士



授編修歷左中允左庶子少詹事侍讀學士升

禮部右侍郎進尚書有建霞樓集

陳皇士云嘉靖以來作者

竝起流派各別登壇樹幟者無慮十數家各執偏見更相訾警要之不能歸於大雅先生以優柔之韻抒穩順之詞純古淡泊蘊藉深美

### 龍池社集

未盡登高興重來結伴游江山仍舊識寒意改深秋席  
地妨樵徑攀花作酒籌醉忘歸路遠還為夕陽留

曾楚卿一首

楚卿字元贊莆田人萬厯癸丑進士改庶吉士  
累官禮部尚書

自芋原至車盤驛

數家烟樹鬱蕭森  
人語殊方莫辨音  
雲傍馬頭晴作雨  
松橫嶺口晝成陰  
闕城晚色疎寒木  
古渡秋風亂夕砧  
信宿淹留吾有意  
故園已在白雲深

葉燦一首

燦字以冲桐城人萬厯癸丑進士改庶吉士授

編修遷南國子司業歷左中允右庶子天啓末  
削籍崇禎初起補少詹兼侍讀學士加禮部右  
侍郎累遷南禮部尚書追諡文莊有天柱南中  
廡下讀書諸集

抱病

別業空山裏孤燈獨夜身  
交游江上淚風雨病中人  
宿鳥翻深竹溪流響亂榛  
居然成小隱日日白綸巾

李繼貞 二首

繼貞字散尹太倉州人萬歷癸丑進士歷官兵  
部右侍郎有萍槎集

五人詠

義士殺人都市中姓名不藏身不匿明知國法熾如爐  
況是鉗網當羅吉挺身就吏不辭家無勞伍伯來相逼  
此時上官方自功御此五人如束濕夜提鈴晝設棘五  
人齒冷笑不必一尉一人抵於法自相匹即令倍償之  
二三亦已畢何煩五命酬一賊但取無失大璫心人命

草菅何足恤臨刑駢首受青鋒相顧慷慨無變色嗟乎  
五人生為義士死作神不然厲鬼除君側

猛虎行

山深月黑風怒號猛虎磨牙求汝曹子欲夜行何處逃  
歸來有吏夜守門追捕如虎憂心焚雞豚鬻盡將兒孫  
不忍老年見生別寧拚瘦骨為虎吞同是猛虎此有冠  
騶虞見之徒心酸同是猛虎此有翼狡狴見之亦變色  
行乎行乎擇害莫若輕倖脫虎吻留餘生

王心一三首

心一字純甫吳縣人萬歷癸丑進士由行人選  
授江西道御史累官刑部左侍郎有歸田園詩  
集

上太行

驅車上太行山頑無奇石逶迤有千盤石磴轉偏側壁  
如摩空鳥漸與青雲迫俯見蒼崖間春花間紅白山家  
愛尺土縱橫界如畫上有千年碑孔父留轍跡摩挲落

日遲返景射石壁祇慮豺虎驕解鞍投荒驛

歸渡揚子江

久客天邊路言歸江上舟山光分遠渚塔影漾中流薄  
霧籠江樹平沙狎海鷗乘潮片時渡十里隔瓜洲

苕溪

細雨苕溪曲微風渡小航有園多種竹無屋不圍桑語  
覺吳儂近流分震澤長烏巾春店近白酒熟盈觴

方震孺一首

震孺字孩未壽州人萬歷癸丑進士除知沙縣  
擢湖廣道御史巡按遼東被逮下獄崇禎初特  
釋歷官都御史巡撫廣西

丁卯中元余在繫經三中元矣

黑海中元三度過青山一望淚滂沱浮生幾日仍衣食  
鄉夢頻宵怯網羅心上孟蘭依古寺天邊墳墓近淮河  
荒原秋草知蕭瑟况復傾巢江上波

繆昌期 四首



昌期字當時常熟人萬厯癸丑進士改庶吉士授檢討歷左諭德死奄禍贈詹事諡文貞有從野堂存橐

詩話六君子之獄多以攻客魏取禍文貞無言責而黨奄人者尤惡之蓋以善謀見嫉也文貞與顧涇陽書云東漢南宋之事某感歎於中者久矣互相標榜豈士君子之幸哉又與楊大洪書不肖歸矣便可不復出又與葉臺山云不入長安門不知世路之險且惡也是亦明哲之見而終不免焉命矣夫

賦得夏母篇書文太君障子

有序

夏忠靖母廖夫人忠靖幼孤夫人教之嚴而愛  
事姑甚謹姑病執其手語曰吾無以報汝願汝  
壽過我子孫事汝如汝事我忠靖拜大司農夫  
人年八十晉封太夫人三楊及胡祭酒諸公皆  
升堂拜焉

忠靖掌邦計母廖尚皓首別殿賜宴歸高堂介眉壽是  
時長陵中羣公竝耆舊三楊列館閣胡公為祭酒連鑣  
登母堂却行拜階右鏘鏘委佩聲肅肅奉觴走母也徐

唱言雍容三爵後上云主恩深報稱莫相負下云計臣  
勞提挈視吾友嗟此良宴會明時信非偶誰與矢德音  
乃在一寡婦養姑泣下泉持家敝箕帚尚書信卿才訓  
迪自黃口蟲魚箋獨勞鈞軸教已久繇來孤貧免往往  
踐台斗

送門人程灝然

我已離羣久君能歲一來茶瓜談舊事水石坐新苔病  
骨翻然醒愁容頓爾開且遲松際月莫聽暮潮催

賦得秋聲一鴈飛

淅瀝金風動碧林，遙空獨鴈助長吟。  
聲寒絕塞三千里，影照長安一片砧。  
秦隴雲橫朝起笛，瀟湘月冷夜聞琴。  
於今聖世銷烽火，北海應無繫帛音。

洪葆原文闕政報滿還朝

錦帆簫鼓出江湄，水凍黃河驛路遲。  
鄉味久應忘荔子，客情偏自憶蓴絲。  
閭門柳色非前日，長樂鍾聲似舊時。  
聞道使君廉載石，江東父老望旌麾。

周宗建一首

宗建字季侯吳江人萬厯癸丑進士除武康知縣調仁和擢福建道御史巡按湖廣被逮死奄禍贈太僕卿諡忠毅

詩話魏進忠未更名曰忠毅因冰雹即訟言攻之尋又上言乳母不當入宮引王聖趙嬖陸令萱以為前鑒及德陵遭劉朝行邊又言內臣典兵有三不可九害以是客魏之黨皆怨公刺骨曹欽程舊知吳江縣事遂希旨誣公削奪逮捕考訊九死無屈辭可云百鍊之剛矣詩亦慨當以慷

感事

宮禁高皇誥尚存只今秉筆自言尊太阿已授宵人柄

一作彤弓還  
待賢人禮

檇杙齊沾聖主恩舊定朝儀增祿秩新開

甲第擬侯門驚心流禍中原遍未許蒼生得叩閭

周順昌 二首

順昌字景文吳縣人萬曆癸丑進士除福州推  
官徵授吏部主事轉員外郎死璫禍贈太常寺  
卿諡忠介有燼餘錄

詩話忠介之逮在天啓丙寅三月校尉至知吳縣事陳文瑞持檄詣公公從容談笑入書齋理圖籍見案有素楮為龍樹菴僧乞書者泚筆揮灑拂袖而出入縣解越三日宣詔聚觀者累萬人巡撫立於左巡按立於右諸生王節等肅而前曰大人有事地方詎不知吏部居鄉立朝者今日人情如此明公獨不為青史計乎曷不據實上聞請外臺勤治撫按股栗不敢諾緹騎手銀鐺擲之地大呼囚安在衆怒奮躍而登攀關折楯毆諸校尉詰曰旨何從出曰魏上公於是衆共擊持偽旨者時天雨堂下萬履齊擲緹騎伏撫按脇下一尉匿梁上驚墮而死是夜撫按具疏告變捕十三人下於獄論五人大辟五人者顏佩韋馬傑楊彥如沈揚周文元文元公與丁也佩韋臨刑告知府寇慎曰囚等為周吏部死死於義非為亂也公既斃於錦衣獄歸葬白

愁

蓮橋南馬家墩崇禎初吳人毀魏忠賢晉惠祠  
購佩韋等頭顯台尸葬於是曰五人之墓太倉  
張溥為作碑記先是御史倪文煥首劾公及敗  
畫見五人戎裝帶鉞入其室須臾旌旆導公來  
庭中石井闌忽飛起轟震而去亦異事也公子  
茂蘭字子佩嘗齧指瀝血書疏草訟公冤故邀  
卹典特優渥子佩高隱不仕鄉人私謚端孝先  
生其血書副本尚存於家予曾見之為跋其尾

獨坐鴈聲急風高秋氣空家書千里外舊事一尊中北  
地兵戈滿南園草木叢朝來看壯髮強半欲成翁

詠梅



春半梅將盡中庭尚一枝玉人何處是惆悵月明時

吳伯與一首

伯與字福生宣城人萬歷癸丑進士除戶部主

事歷員外郎中出為浙江布政司參議遷廣東

按察副使有素雲齋集

李本寧云福生詩簡遠曠達兼彭澤左司香山

眉山之長

董思白云

福生騷賦古律體齊梁之綺靡兼燕趙之悲壯黃貞父云福生曠懷

雄藻高岑韋柳惟所汲取而激越時近樊川張子環云宛陵若梅文學禹金湯司成嘉賓標

新領異各成一家君大篇短什時效切磋古體高朗近體道逸不規規于形似

詩話福生素雲集雖無與竟陵  
酬和之作似亦降心從之者

### 宿姑孰

作客休嗟滯浮生合自勞蘋花一枕對蘆荻片帆高生  
計存書史鄉心寄酒槽夜來寒不禁換却舊綈袍

### 汪康謠一首

康謠字唐徵休寧人萬歷癸丑進士除諸暨知  
縣降補順德府教授入為國子監學正遷戶部  
主事歷員外郎出知漳州府終福建按察副使

有萊猗園詩集

東阿道中

高岸深藏谷頽垣曲帶溪草香風過隴土滑雨沾犁  
水流終伏荒臺迹已迷前山不可極馬首暮雲低

沈萃楨一首

萃楨字君聚平湖人萬厯癸丑進士除工部主  
事改南兵部歷員外郎中出知蘇州府遷福建  
按察副使以參政分守蘇松道坐報吳江知縣

曹欽程貪墨罷尋落職起補湖廣按察副使轉  
福建按察使以湖廣右布政使引疾歸

田園詩

不淺鱸魚興君恩許挂冠城陰三畝宅日暮一漁竿風  
翻秋飛鵠花泥晚種蘭兀然微醉好高枕傍闌干

方尚恂二首

尚恂字威侯淳安人萬曆癸丑進士除刑部主  
事歷員外郎中出知建寧府遷湖廣按察副使

謫真定同知改衛輝有玉磬齋詩集

焦山

危嶼江天峙烟光寫翠微吹波豚下上狎浪鳥翻飛客  
與愁猿竝僧呼老鶴歸潮痕出深樹片片濕征衣

曹操疑冢

漳水築荒臺臺荒銅雀失不知青蒼瓦後自何陵出

沈鳳超一首

鳳超字可凡鄞縣人萬歷癸丑進士除海陽知

縣遷工部主事道卒

自君之出矣

自君之出矣妝奩日掩塵君心如明鏡獨照眼前人

俞琬綸二首

琬綸字君宣長洲人萬曆癸丑進士衢州西安  
知縣有自娛集

詰朝別

醉子黃金卮一卮一番換明日山上山相思旦復旦

古意

不與子同行願與子同夢隨子夢所之相憐不相送

羅賓王二首

賓王字季作番禺人萬厯乙卯鄉薦仕為南昌府同知有散木堂集

詩話季作罷官歸築哭斯堂於里門或怪其誕然方其佐郡欲率師勤王居恒忼慨好談天下事及陷身犴獄志不少挫詩歌多憤懣之詞亦奇士也

辛巳三月寇陷襄陽弑襄藩逾旬破洛陽福藩死

之兩郡居民屠戮不可勝紀

文士侈言兵希取印如斗積誤非一朝寇至如拉朽召  
募煩中樞司農勞稅畝竭粟養驕兵漸積成敝笥卒爾  
襄陽城藩封失其守城陷鼓聲死日落大旗走曾聞賜  
上方三載專征久勉死謝三軍徒為軍國醜嗟彼泄泄  
人處堂不思咎悲憂草野人抱膝徒白首

春日送友人入虔州

旅鴈歸不盡春風朝又過東郊一以別青草更如何客



舍炊榆火征衣換越羅關河莫回首楊柳暮烟多

崔培元二首

培元字辰長海鹽人萬歷乙卯舉人官青陽知

縣有橫山草堂集

長安二首

陳寶開隆祀昆明辨劫灰古來成帝里今日自樓臺國  
事紓西顧天威儼北來綢繆關陝地豈獨武臣才

鵠野天文布龍山地軸雄翦桐開國事累葉後賢功車

馬黃塵裏關河紫塞中從來興王地文物兩京同

明詩綜卷六十五